

## **Tema: Memperbaharui Gereja dengan Iman dalam Keluarga (1 Kor 16: 13-14)**

Pesan perpisahan St. Paulus kepada keluarga Stefanus, yang merupakan salah sebuah keluarga aktif yang pertama dari Gereja perdana, harus menjadi teladan utama pembaharuan bagi semua keluarga moden pada masakini: *“Berjaga-jagalah! Berdirilah dengan teguh dalam iman! Bersikaplah sebagai laki-laki! Dan tetap kuat! Lakukanlah segala pekerjaanmu dalam kasih!”* (1 Kor 16:13-14). Selain itu, keluarga Stefanus telah menunjukkan teladan dengan prinsip yang konkrit untuk melakukan segala sesuatu dalam kasih kerana mereka telah mengabdikan diri kepada pelayanan orang-orang kudus (1 Kor 16:15).

Selain itu, melalui prinsip “pelayanan orang-orang kudus” maka kita akan dapat menghidupkan kembali semangat keluarga kita terhadap “pelayanan orang-orang kudus” dengan mencontohkan cinta alkitabiah, saat seseorang mencari yang terbaik untuk dilayani, yaitu untuk orang lain. Sesuai seperti yang telah dilakukan oleh keluarga Stefanus. Dipenuhi oleh Roh Allah, mereka tunduk kepada kepemimpinan umat di Korintus (Ef 5:18-21), bekerjasama dan mengambil tugas yang sukar dalam pelayanan mereka kepada Tuhan. Selain itu, mereka merelakan diri untuk melayani gereja, bukan itu sahaja malahan Stefanus dan keluarganya juga turut berdoa bersama-sama. Dimana *“Keluarga yang selalu berdoa bersama - akan selalu tetap bersama,”* dalam menjalani kehidupan berkeluarga.

Sememangnya, tidak dapat dinafikan bahawa, tidak ada organisasi asas yang lebih baik dalam sesebuah masyarakat selain daripada sebuah unit kecil yang disebut keluarga. Iaitu sebuah keluarga yang sentiasa menyerahkan kepercayaan mereka kepada Tuhan. Bagaimanapun, pelbagai cabaran dalam dunia moden pada hari ini telah menyebabkan sukar bagi semua anggota keluarga untuk bertumbuh bersama-sama dalam iman. Dimana kecenderungan sosial dan budaya moden telah mempengaruhi corak kehidupan mereka kepada sikap individualisme, ateisme, pluralisme, pilihan peribadi, dan kemewahan yang bersifat sementara telah memberi cabaran kepada keluarga Kristian dewasa ini.

Walaupun Gereja memiliki pelbagai program pendidikan agama yang melibatkan ramai kanak-kanak khusus mereka yang menerima Komuni Kudus Pertama, namun kebelakangan ini data yang diperolehi menunjukkan penurunan jumlah yang drastik. Persoalannya, mengapa mereka tidak kembali? Setelah mempersiapkan dan menerima Sakramen Penguatan ramai remaja atau belia yang perlahan-lahan meninggalkan gereja dan tidak melibatkan diri dalam pelayanan di gereja. Mengapakah hanya sebilangan kecil remaja atau belia masakini yang tetap setia membantu dalam pelayanan di gereja.

Malahan, pelbagai kelas katekismus, program pembentukan iman, program khusus bagi para remaja atau belia, kem rohani, retret dan pertemuan-pertemuan besar kaum muda serta banyak program yang baik bagi membantu pertumbuhan iman mereka telah diwujudkan. Bagaimanapun mungkin terdapat informasi yang kurang tepat sehingga ibu bapa tidak memberikan galakan kepada anak-anak mereka untuk melibatkan diri dalam pelayanan di gereja. Sepatutnya ibu bapa haruslah menggalakkan anak-anak mereka untuk melayani di gereja melalui program pemuatan yang disediakan.

Seterusnya, usaha gereja untuk melaksanakan program pemuatan kurang mendapatkan hasil yang positif seperti yang diharapkan. Situasi ini mungkin disebabkan tiada kerjasama yang padu daripada ibu bapa. Walaupun acap kali gereja mengingatkan kepada ibu bapa bahawa mereka adalah merupakan katekis utama iman anak-anak mereka. Persoalannya mengapa mereka gagal memainkan peranan dalam perkara penting ini, mungkinkah keutamaan mereka telah terpesong ataupun gereja ajaran gereja sendiri yang telah menyebabkan mereka bertindak sedemikian.

Hal yang penting ini telah lama terabai, justeru kita harus meningkatkan usaha dan komitmen bagi mendorong semua keluarga agar berusaha untuk membangunkan iman mereka. Selain itu, kita mesti meningkatkan harapan kepada semua keluarga agar dapat memastikan proses pertumbuhan iman dalam keluarga mereka dapat dilakukan dengan bersungguh-sungguh. Oleh yang demikian, usaha yang berterusan mesti dilakukan bagi memberi kesedaran kepada semua keluarga agar dapat memastikan paradigma pertumbuhan iman diberikan penekanan yang dianggap opsional, menjadi sesuatu yang harus dilakukan secara serius dan konsisten.

Sememangnya, pembaharuan dalam Gereja adalah merupakan pekerjaan Tuhan. Namun, Dia bekerja melalui setiap peribadi kita. Dimana, hak istimewa dan tindakan tersebut adalah milik kita sendiri. Oleh

itu, kita perlu berjaga-jaga, berdiri dengan teguh dalam iman, bersikap berani, dan tetap kuat (lih. 1 Kor 16:13-14) serta menjunjung tinggi iman, harapan dan kasih. Tuntasnya, dasar utama dalam proses pertumbuhan cinta manusia adalah dalam keluarga itu sendiri.

Kesimpulannya , *“Pembaharuan Gereja dengan Iman dalam Keluarga”* hanya dapat direalisasikan jika tujuan utama katekesis diwujudkan dengan menerapkan prinsip “orang-orang tidak hanya berhubungan, tetapi bersekutu dalam keintiman dengan Yesus Kristus: kerana hanya Dia yang dapat menuntun kita kepada kasih Bapa dalam Roh dan membuat kita dapat berbagi dalam kehidupan Roh Kudus (*Catechesi Tradendae* 5).